



Na osnovu člana 2.9 stav (1) tačka 18) Izbornog zakona Bosne i Hercegovine („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24) i člana 18. Poslovnika Centralne izborne komisije Bosne i Hercegovine – Prečišćeni tekst ("Službeni glasnik BiH", broj 32/23), Centralna izborna komisija Bosne i Hercegovine je na 57. sjednici, održanoj 27.10.2025. godine, donijela

ZAKLJUČAK

Član 1. (Predmet)

(1) Pokreće se inicijativa za donošenje Zakona o izmjenama i dopunama Izbornog zakona Bosne i Hercegovine:

a) U članu 2.11 stav (3) brišu se riječi: „uz prethodnu saglasnost Vijeća ministara BiH“.

b) U članu 3.10 iza stava (1) dodaje se novi stav (2) koji glasi:

„ (2) Pored podataka navedenih u stavu (1) ovog člana, za potrebe autentifikacije i identifikacije birača na biračkom mjestu, evidencija Centralnog biračkog spiska može sadržavati i biometrijske i ostale podatke birača sa identifikacionog dokumenta:

- a) otisak prsta lijeve i desne ruke,
- b) fotografiju birača sa identifikacionih dokumenata i
- c) datum važenja identifikacionih dokumenata.

Dosadašnji stav (2) postaje stav (3).

Iza dosadašnjeg stava (2) koji je ovim izmjenama i dopunama postao stav (3) dodaje se novi stav (4) koji glasi:

“(4) Izvodi iz Centralnog biračkog spiska mogu se izrađivati u štampanom i elektronskom obliku.”

Dosadašnji stav (3) postaje stav (5).

U dosadašnjem stavu (3) koji je ovim izmjenama i dopunama postao stav (5) iza riječi: „Formu“ dodaju se riječi: „način korištenja“

c) U članu 4.19 stav (3) se mijenja i sada glasi:

(3) „Svaka kandidatska lista uključuje kandidate muškog i ženskog pola, koji su ravnopravno zastupljeni. Ravnopravna zastupljenost polova postoji u slučaju kada je jedan od polova zastupljen s najmanje 40% od ukupnog broja kandidata na listi. Kandidati pola koji je manje zastupljen raspoređuju se na kandidatskoj listi na slijedeći način: jedan kandidat manje zastupljenog pola među prva dva kandidata, dva kandidata manje zastupljenog pola među prvih pet kandidata, četiri kandidata manje zastupljenog pola među prvih osam kandidata, te ukoliko kandidatska lista broji više od osam kandidata na svakoj narednoj poziciji, kandidatska lista mora sadržavati najmanje 40 % kandidata manje zastupljenog pola.

d) U članu 5.14 stavovi (2) i (3) se brišu

e) Član 5.15 mijenja se i glasi:

Član 5.15 mijenja se i glasi:

„(1) Glasački listić omogućava biraču da glasa samo za jednu od slijedećih opcija:

1. nezavisnog kandidata ili
 2. političku stranku, koaliciju ili listu nezavisnih kandidata; ili
 3. u okviru kandidatske liste jedne političke stranke, koalicije ili liste nezavisnih kandidata, glasa za najviše tri kandidata na jednoj listi koju je birač odabrao. Ako je birač glasao za više od tri kandidata na jednoj listi, smatra se da je taj politički subjekt dobio jedan važeći glas u svrhu raspodjele mandata, dok se preferencijalni glasovi ne broje.
- (2) Birač može glasati samo na način koji je utvrđen u ovom članu, a što Centralna izborna komisija BiH utvrđuje posebnim podzakonskim aktom.
- (3) Za svaku političku stranku, koaliciju, listu nezavisnih kandidata i nezavisnog kandidata, žrijebom se izvlači broj, kako bi se odredio njihov redoslijed na glasačkom listiću. Broj dobiven žrijebom koristi se za određenu političku stranku ili koaliciju za svaki nivo izbora za koji se ta politička stranka ili koalicija pojavljuje na glasačkom listiću. Centralna izborna komisija BiH objavljuje mjesto, datum i vrijeme održavanja žrijeba za redoslijed na glasačkom listiću. Predstavnici političkih stranaka, koalicija, listi nezavisnih kandidata, nezavisnih kandidata i drugi akreditirani promatrači mogu prisustvovati žrijebu.

f) Član 5.17 mijenja se i glasi:

Glasački listić je nevažeći:

1. ako glasački listić nije ispunjen u skladu sa članom 5.15 Izbornog zakona BiH;
2. ako su dopisana imena kandidata; ili
3. ako je označeno više od jedne političke stranke, koalicije, nezavisnog kandidata ili liste nezavisnih kandidata; ili
4. ako se na osnovu oznaka, koje je birač dopisao na glasački listić, kao što je potpis, može utvrditi njegov identitet; ili
5. ako birač označi glasački listić drugačije u odnosu na preciznu instrukciju Centralne izborne komisije BiH
6. ako ne sadrži otisak pečata, ili
7. ako ga nije potpisao član biračkog odbora.

g) Član 5.23 se mijenja i sada glasi:

Član 5.23

- (1) U slučaju da se prebrojavanje glasačkih listića vrši ručno na biračkom mjestu, birački odbor počinje prebrojavanje glasova nakon završetka procesa glasanja i zatvaranja biračkog mjesta.
- (2) U slučaju da se prebrojavanje vrši upotrebom izborne tehnologije kojom se glasački listići broje automatski, automatsko prebrojavanje rezultata i prenos rezultata glasanja vrši se odmah po zatvaranju biračkog mjesta.

h) Iza člana 5.23 dodaje se novi član 5.23a koji glasi:

„Član 5.23a

- (1) Ukoliko se brojanje glasačkih listića ne vrši upotrebom izbornih tehnologija odnosno automatski, pristupa se ručnom prebrojavanju glasačkih listića.
 - (2) Birački odbor prvo broji neiskorištene i oštećene glasačke listiće i stavlja ih u odvojene pakete koji se nakon toga zapečate.
 - (3) Birački odbor nakon toga odvojeno broji birače koji su potpisali izvode iz Centralnog biračkog spiska, birače koji su potpisali poseban izvod iz člana 5.18 ovog Zakona, odnosno
-

izdate potvrde u slučaju da se koristio elektronski izvod iz Centralnog biračkog spiska, te utvrđuje ukupan broj birača, koji su glasali na biračkom mjestu, i upisuje ove podatke u odgovarajuće obrasce, odnosno vrši prenos podataka sa elektronskog uređaja. Birački odbor zatim otvara jednu po jednu glasačku kutiju i broji koverta sa nepotvrđenim glasačkim listićima, ako ih ima, kao i glasačke listiće koji se nalaze u glasačkoj kutiji. Nakon toga, birački odbor broji važeće glasačke listiće kojima je glasano za svaku pojedinu političku stranku, koaliciju, listu nezavisnih kandidata i nezavisnog kandidata, kao i broj glasova za svakog kandidata na kandidatskoj listi, te utvrđuje broj nevažećih glasačkih listića.

(4) Svi članovi biračkog odbora zajednički, jedni pred drugima, vrše ručno prebrojavanje birača, glasačkih listića, koverti s nepotvrđenim glasačkim listićima i glasova iz stavova (3) i (4) ovog člana, i neće odsustvovati tokom navedenog postupka prebrojavanja, osim u opravdanim slučajevima utvrđenim propisima Centralne izborne komisije BiH. Postupak ručnog prebrojavanja obustavlja se za vrijeme odsutnosti člana biračkog odbora.”

i) Iza člana 5.25 dodaje se novi član 5.25a koji glasi:

„Član 5.25a

(1) Nakon zatvaranja biračkog mjesta na kojima je korištena specifična tehnologija za brojanje glasačkih listića, operater pod nadzorom predsjednika biračkog odbora, štampa u tri primjerka završne izvještaje procesa skeniranja glasačkih listića i automatskog brojanja po završetku procesa glasanja, sa ukupnim odzivom za biračko mjesto i sa rezultatima automatskog brojanja glasova, za sve nivoe vlasti.

(2) Izvještaji iz stava (1) sadrže sljedeće podatke:

- a) ukupan broj iskorištenih listića po svim nivoima vlasti
- b) broj nevažećih listića (praznih i nevažećih ostalih) po svim nivoima vlasti
- c) broj važećih listića po svim nivoima vlasti
- d) broj glasova po političkom subjektu po svim nivoima vlasti
- e) broj glasova po kandidatu unutar svakog političkog subjekta po svim nivoima vlasti.

(3) Jedan primjerak izvještaja ostaje na biračkom mjestu radi uvida posmatrača, jedan se dostavlja izornoj komisiji, a jedan se dostavlja Centralnoj izornoj komisiji BiH.

(4) Nakon štampanja rezultata odnosno obrasca rezultata automatskog brojanja vrši se elektronski prijenos rezultata.

(5) Centralna izborna komisija BiH podzakonskim aktom će detaljnije regulisati postupak odnosno redoslijed radnji nakon zatvaranja biračkog mjesta i elektronski prijenos rezultata.

j) U članu 5.30 dodaju se novi stavovi (8), (9), (10), (11) i (12) koji glase:

„(8) Ovlašteni predlagaci za ponovno brojanje glasova iz stava (1) i (2) ovog člana, mogu podnijeti obrazložen zahtjev za ponovno brojanje skeniranih glasačkih listića koji su prebrojani automatski, upotrebom specifičnih tehnologija, ako su ispunjeni uslovi iz stava (4) tačke 1, 2, 3, 4 i 5 ovog člana. Zahtjev se podnosi Centralnoj izornoj izornoj komisiji BiH, putem općinske/gradske izborne komisije.

(9) Ukoliko Centralna izborna komisija BiH usvoji zahtjev iz stava (8) ovog člana, ponovno brojanje u Glavnom centru za brojanje se vrši prvo automatski, a zatim i ručno.

(10) U slučaju da se prilikom ponovnog brojanja glasačkih listića u Glavnom centru za brojanje, utvrde razlike u rezultatima automatskog i ručnog brojanja glasova, validni će biti rezultati ručnog brojanja.

(11) Centralna izborna komisija BiH može podzakonskim aktom utvrditi broj biračkih mjesta na kojim će se izvršiti ponovno kontrolno brojanje. Biračka mjesta će se odrediti metodom slučajnog uzorka prema kriterijima utvrđenim podzakonskim aktom.

(12) Centralna izborna komisija BiH će podzakonskim aktom detaljnije regulisati primjenu ovog člana.

k) U članu 16.17 b riječi: „**uložiti maksimalne napore da**“ i „**osiguraju**“ se brišu.

U članu 16.17 b iza riječi: „na izborima“ dodaje se riječ: „**osigurati**“.

Iza riječi: „zastupljenost“ dodaju se riječi: „**i naizmjenično predstavljanje**“.

U članu 16.17b dodaje se stav (2) koji glasi:

“(2) Kandidati koji smatraju da su im povrijeđena prava iz stava (1) ovog člana mogu podnijeti prigovor Centralnoj izornoj komisiji BiH. Na odluku Centralne izborne komisije BiH može se uložiti žalba Apelacionom odjelu Suda BiH.”

l) U članu 19.9 stav (1) iza tačke 24. dodaje se nova tačka 25. koja glasi:

25.ne osigura svojim kandidatima/kandidatskinjama na izborima jednaku zastupljenost i naizmjenično predstavljanje za prezentiranje njihovog političkog programa i programa njihovih političkih subjekata kako putem javnih, tako i putem privatnih elektronskih medija i online medija u suprotnosti s članom 16.17b stav (1) ovog Zakona;

Član 2.

(Realizacija i rokovi)

(1) Inicijativu iz člana 1. ovog Zaključka sa obrazloženjem odmah dostaviti Parlamentarnoj skupštini Bosne i Hercegovine sa zahtjevom da se inicijativa putem ovlaštenih predlagača uputi u zakonodavnu proceduru na usvajanja po hitnom postupku.

(2) Obavijestiti o pokrenutoj inicijativi za donošenje Zakona o izmjenama i dopunama Izbornog zakona Bosne i Hercegovine Ured Visokog predstavnika (OHR).

Član 3.

(Stupanje na snagu)

Ovaj Zaključak stupa na snagu danom donošenja.

Broj: 05-1-02-1-939-1/25
Sarajevo, 27.10.2025. godine

Predsjednik
Jovan Kalaba